

# DIDZA' RUZEJNI'I BUNÁCH HEBREO

Dios bé'lenè' rè'u didza'  
lu ru'è Zxi'nczè'

**1** Zian lzu len zian ca benè' Dios, bé'lenè' xuz xtau'ru' didza' dza ni'tè lu rú'aque' bönni' glu'è didza' uláz queè'. <sup>2</sup>Na'a, ga ruúdx xtudzè'è, dza ni zoaru' na'a, Dios bé'lenè' rè'u didza' lu ru'è Zxi'nczè'. Dios buzóè' Lè' quiè gaqui queè' Zxi'nè' yúgu'tè le naqui queè' Lè', ati' lu nè'è Zxi'nè' na', Dios benè' yödzlyú ni. <sup>3</sup>Zxi'nè' na' naquè' ca tu le rgu'u yení' qui yöl-la' yení' queè' Dios, len ca naquè' Zxi'nè' ruluí' lahui gdu ca naquè' Dioscz. Runczè' ga nacua'tecz yúgu'tè, rugunè' dxin didza' ru'è len yöl-la' huac queè'. Cati' budx benè' le ruún rè'u dxi'a ca nac dul-la' nabága'ru', yajchö'è cuit lè'è yubél Dios, Nu rö' rna bè' xtsa'tèr.

Zxi'nè' Dios náctèrè' blau  
ca yugu' gbaz la'y

<sup>4</sup>Zxi'nè' Dios náctèrè' blau ca yugu' gbaz la'y queè' Dios, le nactèr blau le lè', lè na' Dios glu'è Lè' le naquè' Zxi'nczè', ca laquè' gbaz la'y queè' na'. <sup>5</sup>Dios gatga gudxè' tuè' gbaz la'y queè' ca na' gudxè' Zxi'nè', gnè':

Zxi'na' nacu',  
Buzóa' Li' na'a.

Gatga bè'è didza' queè' tuè' gbaz la'y ca na' bè'è didza' queè' Zxi'nè', gnè':

Gaca' Xuzè',  
Ati' Lè' gaquè' Zxi'na'.

<sup>6</sup>Lèzca' cni, cati' Dios buzóè' Bi'i queèczè' lu yödzlyú ni, gnè':

La'yíj ládxi'què' Lè' yúgu'tè  
gbaz la'y queè' Dios.

<sup>7</sup>Ca nacquè' gbaz la'y queè', rna:

Lè' runè' ga nacquè' ca bö' reycj  
gbaz la'y queè',

Ati' gbaz la'y tunquè' xchinè',  
runè' ga nacquè' ca gui'.

<sup>8</sup>Na'a, ca nacczè' Zxi'nè', rnè':

Ga rö'u rna bè'u, gna bé'teczu',  
Dios.

Tsahui' nac ca rna bè'u.

<sup>9</sup>Nadxi'inu' le nac tsahui', len clèg le cunác.

Qui lè ni na' Dios budödè' lu  
na'u yöl-la' uná bè',

Len benè' ga ruzí'tèru' Li' xbey  
yöl-la' uná bè'

Ca le tu'zí' xbey lza'u.

<sup>10</sup>Lèzca' cni rnè':

Li', Xan, cati' gzu lau, benu'  
yödzlyú,

Len lu na'zu' buzú' luzxbá.

<sup>11</sup>Huadód quegac, san Li', tsaz  
gdi'u.

Yúgu'tè gtëbgac ca rtëb lari',  
<sup>12</sup> Len ca lari' utubcu' lei, len  
 utsa'cu' lei,  
 San Li', gatga utsá' cuinu'  
 Len gatga ggulu'.  
<sup>13</sup> Dios gatga gudxè' tuè' gbaz la'y  
 queè' ca gudxè' Zxi'nè', gnè':  
 Grò' cuit lè'a yubél  
 Cati' gunra' ga luzechu zxibgac  
 lau'  
 Nup cuta'le'i Li' dxi'a.  
<sup>14</sup> Yúgu'tè gbaz la'y queè' Dios  
 nacquè' bò' huen dxin queè' Dios,  
 nasölè'è lequè' láclenè' nup ni  
 nulagac.

**Cutu ral-la' uca'nru' ca'z yöl-la' ruslá**

**2** Qui lè ni na', szxónitër ral-la'  
 güi' ládxi'ru' le chbyóniru',  
 cui gac chop ládxi'ru'. <sup>2</sup> Guc bè' nac  
 gdutè li didza' na', dza ni'tè bdxin  
 lu na'què' gbaz la'y queè' Dios, ati'  
 yúgu'tè nup guladód bè'i ca rna  
 bè' didza' na' len cutu glun ca rna  
 didza' na', Dios benè' lequè' xzguia'  
 ca na' rajlóz le glunè'. <sup>3</sup> Lëzca' cni  
 cutu ca' ularu' rè'u lu xzguia' na'  
 chqui' uca'nru' ca'z yöl-la' ruslá  
 ni, lè na' benè' lban qui zi'al  
 Lëczè' Xanru', ati' nup gulayöni Lè'  
 gululu'f'i rè'u nac gdutè li. <sup>4</sup> Lëzca'  
 cni Dioscz benè' tsaxón lequè' lna'  
 lau, le benè' le nacgac bè' len le  
 tun ga rubániru', len yugu' yöl-la'  
 huac zxön. Gdisiè' ca' quequè' yugu'  
 le runödzjè' Dios Bö' La'y tsca  
 gu'ncznè' Dios.

**Dios benè' ga böaquè' Jesús  
 gdu ca nacru' rè'u**

<sup>5</sup> Dios cutu budödè' lu na'què'  
 gbaz la'y queè' yödzlyú zi'a za', lè  
 na' rui'ru' didza' qui. <sup>6</sup> Na'a, ca nac

lè ni, nayúj lu guich la'y didza' bè'  
 nu run lna' lau, rna:

Dios, rubántsquida' le rui'  
 ládxi'cu' bunách.

Rubántsquida' le ráclenu' lequè'.

<sup>7</sup> Yelati'z cuidi' ca yugu' gbaz la'y  
 quiu' benu' lequè'.

Buzú' quequè' yöl-la' zxön len  
 yöl-la' run ba la'n

Len budödu' lu na'què' yúgu'tè  
 le benu' Li'.

<sup>8</sup> Yúgu'tè budödu' lu na'què' quiè  
 la'ná bé'inè' lei.

Nayúj lu guich la'y lè na', rna:  
 “Budödu' lu na'què' yúgu'tè.” Cutu  
 bi buca'nè' le cutu budödè' lu  
 na'què', san ga rdxintè na'a dza,  
 cutu rlé'iru' yu'u lu na'què' yúgu'tè.  
<sup>9</sup> Ráquibe'iru' bi guc queè' Jesús. Tu  
 chi'z, Dios benè' ga böaquè' yelati'z  
 cuidi' ca yugu' gbaz la'y queè',  
 böaquè' bunách quiè gutiè', gzxaca'  
 gdi'è Jesús lu yöl-la' gut uláz  
 quegac yúgu'tè bunách, le buzá'  
 ladxè'è queèru' cni Dios. Le benè'  
 cni Jesús, Dios benè' ga rata' queè'  
 yöl-la' yení' len yöl-la' run ba la'n.

<sup>10</sup> Dios benè' yúgu'tè le rlé'iru'  
 len runè' ga nacua'tecz. Dios benè'  
 ca ral-la' gunè' cati' benè' ga nac  
 bè' naquè' gdu Cristo ni'a qui le  
 gzxaca' gdi'è. Cni benè' Dios queè'  
 Cristo, Nu bdel-li' yöl-la' ruslá  
 quiè gac gchè'è bunách zian yehua'  
 yubá queè'. <sup>11</sup> Ruúnè' dxi'a bunách  
 quiè laqui quizi queè' Dios. Nup  
 na' ruúnè' Cristo dxi'a, tuzè' naquè'  
 Xuzquè' len Xuzczè'. Qui lè ni na',  
 cutu ca' rutui'nè' Zxi'nè' Dios, rnè'  
 nacquè' böchi' lzè'è. <sup>12</sup> Ca nac lè ni  
 nayúj lu guich la'y, rna:

Quíxjöi'da' böchi' lza'a ca nacu'  
 Li', Dios.

Gatsj lahui'l bunách tu'dúb quiu',  
Gul-la' quiu' yöl-la' ba.

<sup>13</sup>Lëzca' cni rnè':

Uzxöni ladxa'a-nè' Dios.

Ga yubl nayúj, rnè':

Gul-yutsca' neda' len yugu'  
zxi'nè',

Nup na' Dios bennè' quia'.

<sup>14</sup>Qui læ ni na', le náquicnè' bëla'

len rön yugu' zxi'nè' na', læzca'  
cni Cristo ben cuinè' ca nacquè',  
böáquinè' bëla' len rön. Cni  
benè' quiè guc gutiè' len cni guc  
busnitiè' yöl-la' huac uná bè' qui  
tu' xöhui', nu na' dè lu nè'i gdödi  
bunách. <sup>15</sup>Cni benè' Cristo quiè guc  
busanè' yúgu'tè nup glac ca bönni'  
nadá'ugac tsal ni nacuá' nabangac,  
le gladxi yöl-la' gut. <sup>16</sup>Nac bè' cutu  
benè' cni quiè gáclenè' yugu' gbaz  
la'y queè' Dios, san quiè güclenè'  
yugu' zxi'n xsoè' Abraham. <sup>17</sup>Qui læ  
ni na', ben bayúdx böaquè' Cristo  
gdu ca nacquè' böchi' lzè'è na',  
quiè gaquè' lahuè' Dios tu bxuz  
blau, runè' ca rnè' len ruhuechi'  
ladxè'è bunách, lenca' quiè gunè'  
le gun ga gata' lu në'è ugüè' dul-la'  
nabága'gac bunách. <sup>18</sup>Na'a, le  
gzxaca' gdi'è Lëczè' Cristo, ati' gzxi'  
bè' Lè' tu' xöhui', qui læ ni na' napè'  
yöl-la' huac gáclenè' nup ni, rzi' bè'  
lequè' tu' xöhui'.

**Jesús náctèrè' blau ca Moisés**

**3** Qui læ ni na', böchi' lza'adau',  
lbi'ili' na' nacli' quizi queè'  
Dios le bulidzè' lbi'ili' Dios, gul-yú  
dxi'a ca naquè' Jesucristo. Naquè'  
gbaz nasölè'è Dios lenca' bxuz blau  
qui le nazí' lu na'ru'. <sup>2</sup>Jesús ni  
runè' ca rna xtidzè'è Dios, Nu na'  
buzóa Lè' xlatjè', ca na' benè' ca'

Moisés, benè' ca rna xtidzè'è Dios  
laugac yúgu'tè bunách queè' Dios.  
<sup>3</sup>Náctèrè' blau Jesús ca Moisés,  
quiè gac queè' yöl-la' ba, ca na'  
nacrè' blau bönni' naqui queè' tu  
yu'u ca nac huen dxin zoè' lu yu'u  
na'. <sup>4</sup>Yúgu'tè yu'u, zoa nu ben lei,  
san Dios naquè' Nu ben yúgu'tè le  
rlé'iru'. <sup>5</sup>Le nactè Moisés benè' ca  
rna xtidzè'è Dios laugac bunách  
queè' Dios, guquè' ca bönni' huen  
dxin, len benè' lna' lau qui didza'  
ral-la' gu'è Dios, <sup>6</sup>san Cristo runè'  
ca rna xtidzè'è Dios, len naquè'  
Zxi'nczè', nacuá' lu në'è bunách  
queè' Dios. Rè'u ni, nacru' bunách  
na' queè' Dios chqui' gacru' tsutsu  
ga gdxinr dza udx, gacru' tsutsu ca  
rdíp ládxi'ru' lenca' ca rudzí jilenru'  
lè na' runru' löz.

**Dè latj ga luzí' ládxi'gac  
bunách queè' Dios**

<sup>7</sup>Qui læ ni na', nayúj lu guich ca  
rnè' Dios Bö' La'y, rna:  
Na'a, chqui' rýónili' didza' ru'è  
Dios,  
<sup>8</sup>Cutu gacli' zid lu icj ládxi'dau'li'  
Ca na' glac nup ni' guladá'baga'  
Dios  
Cati' ni' gulazí' bè' Lè' lu latj  
ca'z.  
<sup>9</sup>Ni' gulazí' bè'è neda' xuz xtau'li'  
Zal-la' gulalé'inè' le bena' gdu  
ca choa' iz.  
<sup>10</sup>Qui læ ni na' gleyda' bunách dza  
ni'  
Len gnia': "Ta'chíxitecnè' ca  
ta'zá' ládxi'què'.  
Cutu tè'nnè' la'nöznè' le rè'nda'  
lunè'."  
<sup>11</sup>Qui læ ni na' gleyda' lequè' len  
bena' tsutsu xtidza'a, gnia':

“Cutu la'yaziè' ga luzí' ládxi'què' tsaxón len neda'.”

<sup>12</sup>Gul-gún chi'i cuinli', böchi' lza'adau', cui gacli' curejlè' xöhui' nituli' lbi'ili', len cui usanli'-nè' Dios ban. <sup>13</sup>Na'a, gul-zejni'li' tuli' yetuli' yúgu'tè dza, tsal ni nac dza ni zoaru' na'a, cui si' ye'i lbi'ili' le nac dul-la', len cui gacli' zid lu icj ládxi'dau'li' nituli' lbi'ili'.

<sup>14</sup>Yúgu'tèru' gunru' tsaxón Cristo chqui' gacru' tsutsu ga gdxinr dza udx, ca na' gzu lau rdip ládxi'ru'.

<sup>15</sup>Cni ral-la' gunru' tsal ni rna: Na'a, chqui' ryónili' chi'è Dios, Cutu gacli' zid lu icj ládxi'dau'li', Ca na' glac nup ni' guladá'baga' Dios.

<sup>16</sup>¿Nupx na' gulayöni xtidzè'è Dios len guladá'baga' Lè'? Glun cni yúgu'tè nup ni' bubijè' lequè' luyú Egipto Moisés. <sup>17</sup>¿Nupx na' gleyñè' Dios gdu ca choa' iz? Glac nup ni' glun dul-la', ati' glat lu latj ca'z.

<sup>18</sup>¿Nupx ni' benè' tsutsu xtidzè'è Dios, gnè' cutu la'yaziè' ga luzí' ládxi'què' tsaxón len Lè'? Glac nup ni' cutu glun ca rna xtidzè'è Dios. <sup>19</sup>Na'a, ráquibe'iru' cutu guc la'yaziè' le cutu gulayejlè'è Dios.

**4** Na'a, tsal ni nagá'n queèru' le gzxi' lu në'è Dios quiè gac tsazru' latj queè' ga uzí' ládxi'ru', ral-la' gádxiru' qui nadxi unitli' latj tsazli' ni'. <sup>2</sup>Byóniru' rè'u didza' dxi'a ca na' gulayönnè' lequè', san lequè' cutu guluzi'è xbey didza' na' gulayönnè', le cutu gulayejlè'è Dios cati' gulayönnè' lei. <sup>3</sup>Rè'u ni réjlè'ru' Dios, ati' tsazru' latj queè' ga uzí' ládxi'ru'. Rac ca na' gnè' Dios:

Qui lè ni na' gleyda' lequè'  
Len bena' tsutsu xtidza'a, gnia':

Cutu la'yaziè' ga luzí' ládxi'què' tsaxón len neda'.

Dè latj tsazru' ga uzí' ládxi'lenru'-nè' Dios, zal-la' budx benè' xchinè' dza ni'tè Dios cati' ni' benè' yödzyú ni len chruzí' ladxè'è. <sup>4</sup>Nayúj lu guich la'y ga rui' didza' ca nac qui dza bugádx, rna: “Buzí' ladxè'è Dios dza bugádx yugu' lu dxin benè'.” <sup>5</sup>Ga yubl rna: “Cutu la'yaziè' ga luzí' ládxi'què' tsaxón len neda'.” <sup>6</sup>Nup ni', zi'al gulayöni didza' dxi'a, cutu gulayáz ni' le cutu glun ca rna xtidzè'è Dios. Qui lè ni na', ral-la' la'yáz ni' bunách yubl. <sup>7</sup>Qui lè ni na' ca', Dios bulu'è tu dza yubl, gnè': “Na'a dza.” Cni nac, cati' chgdöd iz zian, bè'è didza' Dios lu ru'è David, ca na' nayúj lu guich la'y, rna:

Na'a dza, chqui' ryónili' didza' ru'è Dios,

Cutu gacli' zid lu icj ládxi'dau'li'.

<sup>8</sup>La'naru' benè' Josué ga guluzí' ládxi'què', cutu bè'è didza' Dios gdöd ni' qui yetúr dza cati' nu uzí' ládxi'len Lè'. <sup>9</sup>Qui lè ni na', nagá'n quegac bunách queè' Dios latj la'dél-li'nè' ga luzí' ládxi'què'. <sup>10</sup>Nup la'yáz ga luzí' ládxi'gac tsaxón len Dios, luzí' ládxi'què' lu dxin tunè', ca na' buzí' ladxè'è Dios yugu' lu dxin benè' Lè'. <sup>11</sup>Qui lè ni na', ral-la' güi' ládxi'ru' tsazru' ga ni' uzí' ládxi'lenru'-nè' Dios. Cutu ral-la' tá'baga'ru' xtidzè'è ca na' glun nup ni' cutu gulayejlè' Dios, len cutu gulayáz ni'.

<sup>12</sup>Bancz nac xtidzè'è Dios len napcz yöl-la' huac. Rchugur ga rè' ca guia tuchi' natuchi' grop rui'i. Rchugu rdxin ga ta'dzág bö' nacczru' len le zoa lu icj

ládxi'dau'ru', lenca' röxj ga rdxintë lu dxit lu bin. Run ga nac bë' le rbequi icjru' len le rza' ládxi'ru'.

<sup>13</sup>Cutu bi gac ucáchi'ru' ga cugác glé'inë' lei Dios. Yúgu'të le nunczë' Dios nalá' lahui len narúj ga lna' lahuë' Dios. Lahuë' Lë' run bayúdx quíxjö'ru' le nunru'.

**Jesús naquë' bxuz blau, náctërë' zxön**

<sup>14</sup>Zoa queëru' tu bxuz blau, náctërë' zxön, Nu na' gdöd ni' yehua' yubá, Jesús, Zxi'në' Dios. Qui lë ni na' ral-la' uga'nru' tsutsu ca nac le nazí' lu na'ru'. <sup>15</sup>Zoa queëru' tu bxuz blau, Nu gac huechi' ladxi' rë'u ca nacgac le rac queëru', le gzxí' bë' Lëczë' tu' xöhui' gdutë ca na' rzi' bë' rë'u tu' xöhui' na', san cutu bi dul-la' benë' Lë'. <sup>16</sup>Qui lë ni na', gdu ládxi'ru' ral-la' gbíga'ru' gal-la' ga röhë rna bë'ë Dios, Nu ruzá' ladxi' queëru', gnabru' lahuë' huechi' ladxë'të rë'u len uzá' ladxë'të queëru', gáclenë' rë'u cati' bi rac queëru'.

**5** Dios rböczë' núti'tëz bxuz blau ladj bunách, len ruzóë' lë' gunë' uláz quegac bunách yugu' le runë' lahuë' Dios, len cu'ë lahuë' Dios yugu' le tu'nódzj bunách len yugu' böa' bëdx tu'dödcdë'-ba' lu bcugu la'y ni'a qui dul-la' nabága'quë'. <sup>2</sup>Bxuz blau na', le rac queë' tuz ca rac quegac bunách, gac gaquë' zxön ladxi' len nup nacgac cunözi len nup ta'chixi ta'nigui. <sup>3</sup>Qui lë ni na', le naquë' bunáchz bxuz blau na', ni'a qui dul-la' nabága'czë' ral-la' cu'ë lahuë' Dios böa' bëdx na' tu'dödcdë'-ba' lu bcugu la'y, ca na' runë' ca' ni'a qui dul-la' nabága'gac bunách.

<sup>4</sup>Nutu nu gac gun cuini bxuz blau, san Dios rulidzë' nu ral-la' gac bxuz blau, ca na' bulidzë' Aarón. <sup>5</sup>Lëzca' cni guc queë' Cristo, cutu ben cuinë' bxuz blau, san Dios buzóë' Lë' ca bxuz blau. Ca nac lë ni, Dios gudxë' Lë':

Li' nacu' Zxi'na'.

Buzóa' Li' na'a.

<sup>6</sup>Lëzca' cni gudxë' Lë' le nayúj ga yubl, gnë':

Li' nácteczu' bxuz,

Ca na' guquë' bxuz Melquisedec.

<sup>7</sup>Cristo, cati' ni' zoaczë' yödzyú ni, bulidzë' Dios len gúta'yuë' lahuë'. Grödxyë'të len grödxë' lahuë' Dios, Nu guc uslá Lë' lu yöl-la' gut, ati' Dios byönnë' Lë' le gúdxinë' Lë' gdu ladxë'të. <sup>8</sup>Zal-la' guquë' Zxi'në' Dios, bzëdë' gunë' ca rna xtidzë'të Dios le glac queë' le gzxaca' gdi'të. <sup>9</sup>Cati' chguquë' Cristo gdu ca ral-la' gaquë' bxuz blau, Dios benë' Lë' Nu ruslá tsaz yúgu'të nup tun ca rna xtidzë'të. <sup>10</sup>Ni'r Dios buzóë' Lë' naquë' bxuz blau ca na' guquë' bxuz blau Melquisedec.

**Zoa banádx queëru' hueycjru' tá'baga'ru'-në' Cristo**

<sup>11</sup>Ca nac lë ni, zian le ral-la' güí'lentú' lbi'ili' didza', le nac baníg quíxjöi'tu' lbi'ili', le curéjni'nili'.

<sup>12</sup>Chgdöd dza ral-la' gac usédili' bunách xtidzë'të Dios, le chbyónili' xtsey, san rquínili' nu quixjöi' lbi'ili' leyúbl yugu' le cunác baníg nazí' lu në'i nu zi'a rejle'. Naga'nli' ca bi'i huë'ndau' ta'quínibi' nidxi' len clëg la' huagu tsutsu. <sup>13</sup>Yúgu'të bönni' naquincnë' nu usëdi lequë' lë na' cunác baníg, nacquë' ca bi'idau' ti'jbi' nidxi'. Cutu nazëdquë' ca

rajl'óz le nac tsahui'. <sup>14</sup>La' huagu tsutsu tu'zí' xbey nup chnalgac, nup na' gac láquibe'i le nac dxi'a len le cunác dxi'a, le nugunquè' dxin yöl-la' rejni'i quequè'.

**6** Qui læ ni na', cutu ral-la' usédteczru' yugu' zxba bzèdru' cati' zi'a gzu lau ryóniru' ca nac queè' Cristo. Ral-la' nör-ru' quiè gacru' gdu bunách queè' Cristo. Cutu naquín usèdru' leyúbl yugu' zxba cunác baníg ca ral-la' ubí'i ládxi'ru' len ca cutur gunru' le cunác, len ca ral-la' tséjlè'ru'-nè' Dios, <sup>2</sup>len ca nac zxba qui le rdilru' nis, len ca rxoa na'ru' bunách ta'yejlè' Cristo, len ca ral-la' lubán nup natgac, lenca' ca gunè' Dios, gchuguè' quegac bunách tua'dò', chqui' chnazèdru' yúgu'tè læ ni. <sup>3</sup>Cni gunru' chqui' gunnè' rè'u latj Dios.

<sup>4-6</sup>¿Naru' huactsa gunru' ga lubí'i ládxi'gac leyúbl nup tu'huéycj ta'dá'baga' Dios? Chqui' bdxin quequè' yení' queè' Dios, len guluzi'è xbey le runödzejè' Dios zoè' yehua' yubá, len glaquè' tuz len Dios Bö' La'y, len chqui' guluzi'è xbey didza' dxi'a queè' Dios len yöl-la' huac qui dza zi'a za', len chqui' ni'r tu'huéycj ta'dá'baga' Dios, cutu ca' gac nu gun ga lubí'i ládxi'gac leyúbl, le gac tsca ludé'è leyúbl læ'i yag cruz Zxi'nè' Dios len lunè' tsca lutitjè' Lè' lahui' laugac bunách. <sup>7</sup>Nup tun cni nacgac ca yu na' ruzí' xbey nis guiøj le rbix lahui zian lzu. Chqui' yu na' runödzej le tu'zí' xbey nup ta'n yu na', rdzag ladxè'è lei Dios, <sup>8</sup>san chqui' ruzóaz lba yötsi' len bëscá' yu na', nac ditj len nabía dö', len nac quiè nu uzegui' lei.

**Le runru' löz le run ga nacru' tsutsu**

<sup>9</sup>Zal-la' rui'tu' cni didza', lbi'ili' na' nadxi'itu', ráquitu' ruzi'li' xbey le nacgacr dxi'a, le tu'zí' xbey nup nulagac. <sup>10</sup>Dios naquè' tsahui' len cutu gal ladxè'è dxin dxi'a benli' len yugu' le benli' le nadxi'ili' Lè', gúclenli' nup náquigac quizi queè' Dios len runli' xchingac.

<sup>11</sup>Na'a, ré'nitu' güi' ládxi'li' tu tuli' gunli' cni ga gdxinr dza udx, quiè gata' gdu queèli' læ na' runli' löz.

<sup>12</sup>Ré'nitu' cugacli' zxhuèd, san gunli' ca tun nup ta'yejlè' Dios len ta'bóz zxön ladxí, ati' gdél-li'li' yugu' le gzxi' lu nè'è Dios gunnè' queèru'.

<sup>13</sup>Cni gac, le benè' tsutsu xtidzè'è Dios cati' gzxi' lu nè'è bi gunnè' queè' Abraham. Le cutu zoa nu nacru blau ca Dios, qui læ ni na' gney cuinè', cati' ni' benè' tsutsu xtidzè'è. <sup>14</sup>Cni gnè' Dios: "Le nactè guna' ga gac dxi'a quiu', len guna' ga la'yántscabi' zxi'n xsu'." <sup>15</sup>Glözè' zxön ladxí' Abraham, ati' bdél-li'nè' le gzxi' lu nè'è Dios gunnè' queè'.

<sup>16</sup>Cati' runè' tsutsu xtidzè'è bönni', rneynè' nu nactèr blau ca læ', ati' læ ni ruzóa dxiz yúgu'tè didza' bizxj, le nunè' tsutsu xtidzè'è. <sup>17</sup>Qui læ ni na' benè' tsutsu le gzxi' lu nè'è Dios gunè', gney cuinè', le gu'nnè' ului'inè' nup luzí' xbey le gzxi' lu nè'è unödzejè' quequè', nactsca löz len tsaz nac le nuzóa lahuè' gunè'. <sup>18</sup>Le gzxi' lu nè'è Dios len le benè' tsutsu, chop ni gatga gdza'gac, len ca nac quegac chop ni, cutu gac si' yè'è Dios. Cni benè' Dios quiè gactsca löz queèru' tu le hui' zxön rè'u. Ruzxöni ládxi'ru' Lè' gdél-li'ru'

lë na' runru' löz le nuzöë' queëru'.  
<sup>19</sup>Lë na' runru' löz ruzoatecz tsutsu  
 icj ládxi'dau'ru', len nac ca tu du  
 guia ruzóa dxiz barco. Lë na' runru'  
 löz run chi'ë ni'a queëru' Cristo ga  
 ni' zoë' Dios yehua' yubá, le nadxín  
 lu latj la'y na' zoa cudzi'l lari' nal-la'  
 lu gdau' zoa ni' yehua' yubá. <sup>20</sup>Ga  
 ni' zoë' Dios, gyazië' Jesús uláz  
 queëru' ca Nu nrör lauru', ati' Dios  
 nuzöë' Lë' naquë' tsaz bxuz blau ca  
 na' guquë' bxuz blau Melquisedec.

**Jesús naquë' bxuz blau ca  
 guquë' Melquisedec**

**7** Melquisedec guquë' bönni'  
 rna bë'ë lu yödz Salem, lenca'  
 bxuz queë' Dios, náctërë' blau. Cati'  
 zuzé'ë Abraham, zuhuöjè' gdöd guc  
 gdil-l cati' buxicjè' bönni' ta'ná bë'ë,  
 brujè' Melquisedec na', yajtsaguë'  
 Abraham len gnabné' Dios gun la'yè'  
 Abraham. <sup>2</sup>Abraham bë'ë queë' tu  
 cuia tsa tu chi cuia qui yúgu'të  
 le bdél-li'nè' lu gdil-l na'. Ca lë'  
 Melquisedec na' rna lu didza' xidza':  
 "Bönni' Uná Bè' Tshui'", len naquë'  
 ca' Bönni' rna bë'ë lu yödz Salem,  
 le rna lu didza' xidza': "Bönni' Uná  
 Bè' Rbequi Dxië'." <sup>3</sup>Cutu zoa lu  
 guich le rna gulacu'ë xuz xnè'ë, o  
 xuz xtau'huë', len cutu nayúj dza  
 guljè' o dza gutië', san naquë' ca  
 naquë' Zxi'nè' Dios le naquë' tsaz  
 bxuz blau.

<sup>4</sup>Gul-yutsca' na'a, ca na' guquë'  
 zxön Melquisedec na', le bë'ë queë'  
 lëczë' xuzru' Abraham tu cuia tsa  
 tu chi cuia qui lë na' glijè' lu na'quë'  
 bönni' ta'ná bë'ë ni' buxicjè' lu  
 gdil-l. <sup>5</sup>Lu xzba queë' Moisés, Dios  
 rna bé'inë' yugu' zxi'n xsoë' Leví,  
 nup nacgac bxuz, la'zi'ë tu cuia

tsa tu chi cuia qui le ta'zí' bunách  
 Israel, zal-la' nacgac di'a dza  
 quequë', le nacquë' yúgu'të' zxi'n  
 xsoë' Abraham. <sup>6</sup>Melquisedec na'  
 cutu naquë' di'a dza quequë', san  
 gzxi'ë tu cuia tsa tu chi cuia lu  
 në'ë Abraham, nu na' bdel-li' yugu'  
 le gzxi' lu në'ë Dios gunnè' queë'.  
 Lëzca' Melquisedec na' gnabné'  
 Dios gun la'yè' Abraham <sup>7</sup>ati' nutu  
 nu gac tá'baga' lë na' rna: "Nu  
 nadel-li'r lahuë' Dios rnabi Dios gun  
 la'yè' nu nacr cuidi'z." <sup>8</sup>Na'a, dza  
 ni zoaru' na'a, nup ta'zí' tu cuia tsa  
 tu chi cuia lu na'gac bunách nacgac  
 ca' bunách tatecz, san Melquisedec  
 na', zoa le run lna' lau queë', rna  
 zoë' nabanë'. <sup>9</sup>Na'a, huac gnaru'  
 queë' Leví len quegac zxi'n xsoë',  
 nup na' ta'zí' tu cuia tsa tu chi cuia  
 lu na'gac bunách, lëzca' gulaguizxjè'  
 tu cuia tsa tu chi cuia cati' ni'  
 Melquisedec na' gzxi'ë tu cuia tsa  
 tu chi cuia lu në'ë Abraham, xuz  
 gul gdöd quequë'. <sup>10</sup>Cni nac, le  
 huac gnaru' Abraham ni' nul'ë  
 lë'ë Leví len yugu' zxi'n xsoë' cati'  
 ni' yajtsaguë' lë' Melquisedec, le  
 cunaljcdë'.

<sup>11</sup>Ta'zí' xzba gna bë'ë Moisés  
 bunách Israel lu na'gac bxuz, nup  
 nacgac zxi'n xsoë' Leví ga nababè'  
 ca' Aarón, bxuz blau. Na'a, la'naru'  
 guc luhuóac gdu tshui' bunách  
 lahuë' Dios le tun ca rna bë' xzba  
 queë' Moisés, cutu ben bayúdx  
 oayé' bxuz ca guquë' Melquisedec  
 len clëg ca guquë' Aarón. <sup>12</sup>Chqui'  
 rutsé'ë Dios ca ral-la' gaquë' bxuz,  
 run bayúdx utsé'ë ca' ca nac xzba  
 queë'. <sup>13</sup>Xanru', Nu na' nayúj lu  
 guich ca nac queë' yugu' lë ni,  
 nababè' yetúr cö' zxi'n xsoë' Israel

ca le nababè' Leví na', len qui cò' zxi'n xsoè' ga nababè' Xanru', nutu nu guc bxuz lahuè' Dios. <sup>14</sup>Nac cni le nac bè' guljè' Xanru' lu cò' di'a dza queè' Judá, ati' Moisés cutu bè'è didza' queè' Judá na' cati' bè'è didza' quegac nup ral-la' lac bxuz.

<sup>15</sup>Nactèr bè' lè ni ni'a qui le rac na'a. Ca na' guquè' bxuz Melquisedec, chbuluí' lahuè' yeturè' bxuz, Jesús. <sup>16</sup>Bönni' ni, cutu guquè' bxuz le rna bè' zxba ca ral-la' lac di'a dza queè', san naquè' bxuz le napè' yöl-la' huac qui yöl-la' na'bán le gatga udx. <sup>17</sup>Nayúj lu guich la'y le run lna' lau queè', rna:

Tsaz nacu' bxuz

Ca na' guquè' bxuz Melquisedec. <sup>18</sup>Na'a, nadúa zxba gul ni', le cutu gdap yöl-la' huac uná bè', len cutu bi guc gun. <sup>19</sup>Zxba queè' Moisés na' cutu guc un gdu tsahui' bunách. Na'a, chgyu'u tu le runru' löz le nacr dxi'a, le run ga gac gbíga'ru' gal-la' ga zoè' Dios.

<sup>20</sup>Cati' benè' Dios ga naquè' bxuz Jesús, benè' tsutsu xtidzè'è. <sup>21</sup>Cutu benè' tsutsu xtidzè'è Dios cati' bucu'è bunách ni' ca bxuz, san cati' benè' ga naquè' bxuz Jesús, benè' tsutsu xtidzè'è, gnè':

Bena' tsutsu xtidza'a neda',

Xanu', gnia':

“Cutu utsá'a ca guna'.

Tsaz nacu' bxuz

Ca na' guquè' bxuz

Melquisedec.”

<sup>22</sup>Qui lè ni na', Cristo naquè' Nu run ga nac löz didza' rucán tsahui' le nacr dxi'a ca lè na' guc zi'al. <sup>23</sup>Yugu' bxuz ni', bönni' zian glaquè', le cutu guc luga'nè' ni le glatiè', <sup>24</sup>san le zóateczè' Jesús,

tsaz naquè' bxuz len cutu gac nu huaz xlatjè' gac bxuz. <sup>25</sup>Qui lè ni na', tsaz gac uslé' nup ta'biga' gal-la' ga zoè' Dios, tu'gún dxin Lè', le zóateczè' nabanè' rnè' dxi'a uláz quequè' lahuè' Dios.

<sup>26</sup>Ben bayúdx soa queèru' tu bxuz blau cni. Naquè' la'y, len gdu dxi'a, len cutu dzaguè' bunách dul-la', san nactèrè' blau ca yúgu'tè le nacua' ni' yehua' yubá. <sup>27</sup>Jesús ni, cutu naquè' ca yugu' bxuz blau yödzyú ni, le ben bayúdx yugu' dza gulagu'è rön lahuè' Dios, guludödcè'-ba' böa' bédx lahuè' Lè' ni'a qui dul-la' nabága'gacczè', ati' gdöd ni' glunè' cni ni'a qui dul-la' nabága'gac bunách. Na'a, Jesús, tsaz glu'è rön lahuè' Dios, cati' ni' budód cuinè' lahuè' Dios, bulaljè' xchönczè' ni'a qui dul-la' nabága'gac yúgu'tè bunách. <sup>28</sup>Lu zxba queè' Moisés nacgac bxuz bunách cunacgac gdu dxi'a, san gdöd bdxin ni zxba queè' Moisés, Dios benè' tsutsu xtidzè'è, benè' ga naquè' bxuz blau Zxi'nczè', le naquè' gdu dxi'a ca ral-la' gaquè' bxuz.

#### Jesús naquè' Bxuz Blau queèru'

**8** Na'a, ca rna lè na' zi'a gnia', nac cni: Zoa queèru' tu bxuz blau cni, Nu na' grò' cuit lè'è yubél Dios ga ni' rø'è, rna bè'è yehua' yubá. <sup>2</sup>Lè' runè' dxin ca bxuz blau lu latj nactèr la'y, le nac gdau' nac gdutè, lè na' buchisè' Xanru', len clèg bunách. <sup>3</sup>Dios rucu'è yúgu'tè bxuz blau quiè la'gu'è lahuè' Dios yugu' le tu'nódzj bunách, lenca' xchöncba' böa' bédx. Qui lè ni na' ben bayúdx soa ca' bi glu'è Cristo lahuè' Dios. <sup>4</sup>La'naru' zoè' luyú ni,



cutu ca' gaquë' bxuz, le nacua'teczë'  
 bxuz ni, nup ta'gú'u lahuë' Dios  
 yugu' le tu'nódzj bunách ca rna bë'  
 zxba queë' Moisés. <sup>5</sup>Yugu' bxuz ni  
 tunë' dxin qui tu le rulu'z, len le  
 nac ca bxin qui lë na' zoa yehua'  
 yubá. Cni nac, le gudxtsquë' Moisés  
 Dios cati' zi'a uchisë' yu'udau' na'  
 náquini guid, gnë': "Byutsca', ben  
 yúgu'të gdu ca nac lë na' bului'ida'  
 lí lu gui'a ni'." <sup>6</sup>Na'a, bxuz blau  
 queëru' ni runë' dxin qui le nactër  
 lsaca', ati' ni'a qui le benë' Lë' zoa  
 queëru' tu didza' rucá'n tsahui' le  
 nactër lsaca' le rui' didza' qui le  
 nactër lsaca' gzxi' lu në'ë Dios gata'  
 queëru'.

<sup>7</sup>La'naru' gdap gdu'të yöl-la' huac  
 didza' na' rucá'n tsahui' gzoa zi'al,  
 cutu ben bayúdx soa didza' buróp  
 ni rucá'n tsahui'. <sup>8</sup>Na'a, Dios rulu'ë  
 cutu glac gdu dxi'a bunách ni' cati'  
 bë'ë didza' ca na' nayúj lu guich  
 la'y, gnë':

Gul-yutsca', gnë' Xanru'. Za'c  
 dza

Cati' uzóa' tu didza' cub ucá'n  
 tsahui',

Le gúnlena' bunách Israel len  
 bunách Judá.

<sup>9</sup>Cutu gac ca guc didza' ni' rucá'n  
 tsahui',

Lë na' bénlena' xuz xtau'quë',

Dza ni' gdel-la'a na'quë',

Bubija' lequë' luyú Egipto.

Le guluca'në' didza' quia' rucá'n  
 tsahui',

Neda' buca'na' lequë', rnë'

Xanru'.

<sup>10</sup>Qui lë ni na', cni gac didza'  
 ucá'n tsahui'

Gúnlena' bunách Israel

Töd yugu' dza ni', rnë' Xanru'.

Uchizia' icj ládxi'dau'quë' zxba  
 quia'

Len uzuja' lei lu icj

ládxi'dau'quë'.

Ni'r gaca' Dios quequë'

Ati' lequë' lacquë' bunách quia'.

<sup>11</sup>Cutu gun bayúdx nu usëdi lzë'i,  
 gna:

Benbë'ë Xanru',

Le lumbë'ë neda' yúgu'të',

Ga su lau nu nac ca'z,

Ga gdxintë nu nac blau.

<sup>12</sup>Huechi' ladxa'a lequë',

Len unít lahua' le cunác tsahui'  
 glunë',

Len cutur tsajneyda' dul-la'  
 nabága'quë'.

<sup>13</sup>Cati' ni' ru'ë didza' Dios qui tu  
 didza' cub rucá'n tsahui', nac le  
 chbgul lë na' gzoa zi'al, ati' chzoa  
 gdua lë na' nagúl len chnac glas.

Latj la'y zoa luyú len latj

la'y zoa yehua' yubá

**9** Na'a, didza' rucá'n tsahui'  
 gzoa zi'al, dzaggac lei zxba ca  
 ral-la' la'yíj ládxi'gac Dios bunách,  
 ati' guc qui luyú ni latj la'y bdzag  
 lei. <sup>2</sup>Cni nac latj la'y na' náquini  
 guid. Lu latj na' dë lahuil, nazí' lei  
 Latj La'y, gulacua' le nua' gui' len  
 bcugu la'y ga ni' gulagu'ë lahuë'  
 Dios yugu' yöt xtildau'. <sup>3</sup>Cudzi'l le  
 buróp lari' nal-la' lu yu'u na' zoa  
 latj ni' nazí' lei, Latj Nactër La'y,  
<sup>4</sup>ati' lu latj ni' gulacua' tu bcugu  
 náquini oro ga na' guluzégui'ë nör,  
 lenca' tu gui'n ga yu'u didza' rucá'n  
 tsahui', len nacu gui'n na' oro, ati'  
 lu gui'n na' gulacua' xzíga'dau' na'  
 náquini oro, nadzá' yöt xtildau'  
 na' nazí' lei maná, lenca' xuyág  
 queë' Aarón, lë na' bubó' xzuxa'

në'i, lenca' yugu' guiöj blag na', nayúj láhuilgac didza' rucá'n tsahui'. <sup>5-6</sup>Lahui gui'n na' gulacua' chop gbaz la'y náquicni oro, légac querubín qui latj ga buluí' lahué' Dios, ati' guluzóa xilgac lahuil latj ga ni' glu'ë rön bxuz blau ni'a qui dul-la'. Cni gulucu'ë yugu' lë ni. Cutu gac quíxjö'a na'a gdu ca nacgac lë ni.

Ta'yázteczë' bxuz lu latj zoa lahuil, tunë' ca nac dxin quequë' qui le ta'yj láchxi'quë' Dios. <sup>7</sup>Lu latj buróp ni', tuzë' bxuz blau gyazië' tu lzuz tu iz, len bi'ë rön, le glu'ë lahué' Dios ni'a qui dul-la' nabága'czë' lenca' ni'a qui dul-la' nabága'gac bunách, dul-la' glunë' le cutu gláquibe'inë'. <sup>8</sup>Cni ruzéjni'në' rë'u Dios Bö' La'y, cutu ca' gac gdxinru' lahué' Dioscz tsal ni' tu'gunë' dxin latj la'y na' zoa lahuil lu yu'u la'y na' náquini guid, le bdzag didza' rucá'n tsahui' gzoa zi'al. <sup>9</sup>Yugu' lë ni nac tu le rulu'iz le rac na'a dza. Yugu' le gulagu'ë lahué' Dios len rön quecba' böa' bédx na' guludödcdë'-ba' lahué' Dios cutu gac luún gdu dxi'a icj láchxi'dau'quë' bönni' ni' gulayj láchxi'quë' Dios cni. <sup>10</sup>Yugu' lë ni glui' didza' quegac le gli'j glahué', len ca ral-la' la'guí b cuinquë', len quegac zxba ca ral-la' gac qui gdu ca nayá' nabinquë'. Yugu' lë ni buzóë' quequë' Dios ga bdxintë dza ral-la' utsé'ë yúgu'të.

<sup>11</sup>Na'a, chduluí' lahué' Cristo, naquë' bxuz blau qui le nac gdu dxi'a, le bla' lahui ni'a qui le benë' Lë'. Latj la'y ga na' gyazië' Lë' nacr blau len nacr gdu, len cutu náquini lu ni'a lu na'gac bunách, len cutu nac qui luyú ni. <sup>12</sup>Na'a, chgyazië'

Cristo lu latj la'y na', clëg len xchöncba' bédxdau' len xchöncba' chivo, san len rön queëczë'. Tu lzuz gyazië' lu latj nactër la'y, ati' cni gac, benë' ga nularu' tsaz. <sup>13</sup>Le nactë xchöncba' bédx len chivo, len dö queëba' bédxdau' guluzégui'ë-ba', yugu' le gulagu'ë lu icjgac nup nabága'gac dul-la', gac lugúa dul-la' na' nabága'gac bunách quië luún lequë' dxi'a gdu ca nayá' nabinquë' ca nac qui yöl-la' gdu' quequë'. <sup>14</sup>Na'a, guntër ca' xchönë' Cristo, le budód cuinë' queë' Dios, guquë' gdu tsahui', zóalenë' Lë' Dios Bö' La'y, Nu zoatecz. Na'a, xchönë' Cristo ruún gdu dxi'a icj láchxi'dau'ru' lu yugu' le gbága'ru' le tun ga nu gat, quië gac gunru' xchinë' Dios ban.

<sup>15</sup>Qui lë ni na' naquë' Jesucristo Nu ben tsutsu didza' cub rucá'n tsahui', le gutië' Lë', bugúë' dul-la' gulabaga' bunách cati' ni' zoa didza' gul rucá'n tsahui'. Gutië' ca' quië gac la'zi'ë lë na' gzxì lu në'ë Dios unödzejë' quequë' bönni' bulidzë', le zoatecz. <sup>16</sup>Cati' ratië' nu bönni' len nuca'në' didza' ca ral-la' la'guisië' le naqui queë', run bayúdx gac bè' chnatië' bönni' na' quië gac lunë' ca rna didza' na' nuca'në'. <sup>17</sup>Cati' chnatië' bönni' na', gac lunë' ca rna didza' na', san tsal ni zoë' nabanë', cutu ca' gac lunë' ca rna didza' na'. <sup>18</sup>Qui lë ni na', didza' na' rucá'n tsahui' gzoa zi'al gac lsaca' le bdzag lei rön, le rulu' zoa nu gut. <sup>19</sup>Cati' ni' gdíxjöi'në' bunách ni' Moisés ca nacgac yúgu'të zxba queë' Dios, gdel-lë'ë rön quecba' bédxdau' len quecba' chivo, nutsi'i nis, ati' len tu guíxi'dau' nazí' lei hisopo len lítsa'ba' bö'cu' zxila' le ni'aj

xna, buchijè' ròn len nis na' lahui guich ga na' nayúj zxba na', lenca' láhuigac bunách. <sup>20</sup>Ni'r gudxè' lequè': "Lè ni nac ròn run tsutsu didza' rucá'n tsahui' le gna bé'inè' rè'u Dios gunru' ca rna." <sup>21</sup>Lèzca' cni buchijè' ròn na' Moisés lu latj la'y náquini guid len lahui yúgu'tè le tu'gunè' dxin quiè la'yíj ládxi'què' Dios. <sup>22</sup>Ca na' rna bè' zxba na', yelati'z cuguluhuóatè yúgu'tè ral-la' un dxi'a leygac ròn, ati' chqui' cutu tu'laljë' ròn, cutu gdua dul-la'.

**Xchönè' Jesucristo rugúa dul-la'**

<sup>23</sup>Cni nac, ben bayúdx gzoa le bun dxi'a gdau' luyú ni le nac tu le ruluí'z ca nac læ na' dè yehua' yubá, san ca nac læ na' dè ni' yehua' yubá, ben bayúdx soa le un dxi'a nup la'yáz lei, le nacr lsaca' ca xchöncba' böa' bédxdau' cni. <sup>24</sup>Cutu gyaziè' Cristo latj la'y náquini lu ni'a lu na'gac bunách, læ na' nac tu le ruluí'z ca nac le nac gdu, san gyaziè' la' yehua' yubáz quiè gac uluí' lahuè' na'a lahuè' Dios uláz queèru'. <sup>25</sup>Bxuz blau zoè' luyú ni ryaziè' latj nactèr la'y tu tu iz len ròn quecba' böa' bédx, san cutu run bayúdx tsaziè' Cristo zian lzu quiè udód cuinè' lahuè' Dios. <sup>26</sup>La'naru' guc cni, gun bayúdx saca' qui'è Cristo, gatiè' zian lzu dza ni'tè cati' guta' yödzyú ga rdxintè na'a dza, san na'a cati' nac dza udx, tsaz buluí' lahuè' tu lzuz len budód cuinè' lahuè' Dios, gutiè' quiè bugúè' dul-la' queèru'. <sup>27</sup>Ca na' run bayúdx lat bunách tu lzuz ati' tód ni' cuequi xbeynè' leygac Dios, <sup>28</sup>lèzca' cni, tu lzuz gutiè' Cristo, budód cuinè' lahuè' Dios quiè

bugúè' dul-la' nabága'gac bunách zian. Na'a, uluí' lahuè' le buróp lzu, clèg quiè ugúè' dul-la', san quiè uslé' tsaz nup ta'bó'z Lè'.

**10** Zxba na' gna bè'è Moisés guc tu le ruluí'z ca nac le dxi'a zi'a za'c, len cutu guc gdu ca nacgac. Qui læ ni na', zxba na' queè' Moisés cutu guc un gdu tsahui' nup ni' guladxín lahuè' Dios, nua'gac ròn quecba' böa' bédxdau', læ na' gulagú'uteczè' lahuè' Dios yugu' iz. <sup>2</sup>La'naru' guc un lequè' gdu tsahui', cutu gulagú'uteczè' ròn ni' lahuè' Dios, le cutur láquibe'inè' bönni' guc cni quequè' nabága'què' dul-la' chqui' chguluhuóaquè' gdu tsahui'. <sup>3</sup>Ròn ni' gulagu'è lahuè' Dios yugu' iz yajsá' ládxi'què' nabága'què' dul-la'. <sup>4</sup>Cni guc, le cutu ca' guc ugúa dul-la' xchöncba' bédx len chivo.

<sup>5</sup>Qui læ ni na', cati' bdxinè' Cristo yödzyú ni, gudxè' Dios ca na' nayúj lu guich la'y, rna:

Cutu rè'nnu' nu cu'u lau' ròn quecba' böa' bédx  
San benu' ga naca' bunáchz.

<sup>6</sup>Cutu rdzag ladxu' nu uzegui'-ba' lau' böa' bédx,  
O nu cu'u lau' xchöncba' ni'a qui dul-la'.

<sup>7</sup>Ni'r gnia': "Ni zoa' guna' ca rè'nnu' Li', Dios."

Nac ca na' nayúj lu guich la'y ca gac quia'.

<sup>8</sup>Lè na' nayúj zi'al rna: "Cutu rè'nnè' Dios nu cu'u lahuè' ròn quecba' böa' bédx." Didza' ni ruluí'i rè'u cutur rdzag ladxè'è læ ni Dios zal-la' lu zxba queè' Moisés rna bé'inè' Dios nu gun cni. <sup>9</sup>Gdöd ni' rna: "Ni zoa' guna' ca rè'nnu' Li', Dios." Didza'

ni rulu'í rë'u rugüé' Dios læ na' gulagu'è lahué' zi'al len ruzóè' xlatj le glu'è lahué' Zxi'nczé'. <sup>10</sup>Na'a, Dios ruúnè' rë'u gdu dxi'a le benè' Cristo ca rë'nnè' Dios cati' ni' budód cuinë' lahué' Dios uláz queëru', gutiè' tu lzuz.

<sup>11</sup>Le nactè yúgu'tè bxuz luyú ni, yugu' dza zuicnè', tunè' xchinquè', len la' tuz ca tunè', zian lzu ta'gu'è lahué' Dios xchöncba' böa' bëdx, yugu' le cutu ca' gac lugúa dul-la'. <sup>12</sup>Na'a, Cristo, tu lzuz, tu le glu'è tsaz lahué' Dios ni'a qui dul-la', ati' ni'r yajchö'è cuit læ'è yubél Dios. <sup>13</sup>Ni' rbözè' dza gunè' Dios ga luzechu zxibgac lahué' nup cuta'le'i Lè' dxi'a. <sup>14</sup>Ni'a qui tuz le glu'è lahué' Dios, tsaz benè' ga nacgac gdu nup na' bunè' dxi'a, bubijè' lequè' quizi queè' Dios. <sup>15</sup>Lëzca' cni runè' lna' lau lauru' Dios Bö' La'y, le gnè' zi'al læ na' nayúj lu guich, rna:

<sup>16</sup>Cni gac didza' ucá'n tsahui' gúnlena' lequè'  
Töd yugu' dza ni', rnè' Xanru'.  
Uchizia' icj ládxi'dau'què' zxba quia',  
Len uzuja' lei lu icj  
ládxi'dau'què'.

<sup>17</sup>Gdöd na' gnè':  
Cutur tsajneyda' dul-la'  
nabága'què'  
Len dö' bia'què'.

<sup>18</sup>Qui læ ni na', chqui' chnadúa dul-la', cutur run bayúdx nu bi cu'u lahué' Dios ni'a qui dul-la'.

**Huac gbíga'ru' gal-la' ga zoè' Dios**

<sup>19</sup>Na'a, böchi' lza'adau', gdu ládxi'ru' gac gdxinru' lahué' Dioscz, ni'a qui xchönè' Jesucristo.

<sup>20</sup>Tséajlenru' tu nöz cub len gdu le nuzóè' Cristo le rdxin cudzi'l lari' na' buséyj ga nu ryaz latj nactèr la'y na', huac gnaru', nöz na' bsaljè' queëru' le budödè' xpéla'czè'. <sup>21</sup>Jesús naquè' queëru' tu bxuz náctèrè' blau, len rna bé'inè' bunách queè' Dios. <sup>22</sup>Qui læ ni na' huac gbíga'ru' gal-la' ga zoè' Dios gdu ládxi'ru', len lu yöl-la' run löz queëru', le réjlè'ru' Cristo, le chbunè' dxi'a icj ládxi'dau'ru', cui uxós rë'u ládxi'dau'ru', ati' gdibè' gdu ca nayá' nabinru' len tu nis nactèr gdu. <sup>23</sup>Ral-la' gacru' ca' tsutsu len cui gac chop ládxi'ru' ca nac le runru' löz qui le nazí' lu na'ru', le gzxi' lu në'è Dios gunnè' queëru', ati' Lè' runè' ca rnè'. <sup>24</sup>Ral-la' utíp ládxi'ru' ca' turu' yeturu', gunru' ga gdxiru' lza'ru' len gunru' ca' le nac dxi'a. <sup>25</sup>Cutur tu'dúb len rë'u la'gac bunách. Cutu ral-la' gunru' ca tun bunách na', san ral-la' utíp ládxi'ru' turu' yeturu', len gunr-ru' cni le rlé'iru' chzoa gdxin dza huödè' Xanru'.

<sup>26</sup>Chqui' zéajlenru' runru' dul-la' töd núnbè'ru' le nac gdtè li, cutu ca' nagá'n bi gac cu'ru' lahué' Dios le ugúa dul-la'. <sup>27</sup>Nup tun cni, lu yöl-la' radxi rdzöbi quequè' ta'bözè' dza gchuguè' quequè' Dios, la'yaziè' lu gui' gabíl, læ na' uzégu'itecz nup ta'dá'baga' Dios. <sup>28</sup>Cati' buzóè' tsla'l zxba queè' Moisés bönni', guludöddè' læ' chqui' glun lna' lau qui le benè' chop tsonn bunách, ati' nutu nu buechi' ladxí' bönni' na'. <sup>29</sup>Na'a, gbága'rè' ca' zxguia' bönni' uzóè' tsla'l Zxi'nè' Dios, len uzóè' tsla'l ca' xchönè' run tsutsu didza' rucá'n tsahui', le ruún rë'u dxi'a. Nu bönni'

gunè' cni uca'nè' ca'z Dios Bò' La'y, Nu ruzá' ladxi' queèru' le rquíniru'.

<sup>30</sup>Cni gac, le núnbè'ru'-nè' Dios, Nu gna: "Quia' neda' naqui yòl-la' ruzí' la. Neda' ubi'a quegac bunách, rnè' Xanru'." Lèzca' cni gnè': "Xanru' cuequi xbeynè' bunách queè'."

<sup>31</sup>Ral-la' gadxi gdzòbi nu ral-la' si' zxguia' lu nè'è Dios ban.

<sup>32</sup>Gul-tsajnéy dza chguladód cati' ni' zi'a bdxin queèli' yení', ati' bia' blenli' zian le gulusaca' zi'è lbi'ili'.

<sup>33</sup>Gululídz ditj lbi'ili' bunách, len guludxá lbi'ili' dō' lahui' laugac bunách, ati' benli' tsaxón ca' nup gulazaca' gulaguí'i cni. <sup>34</sup>Cni gac, le buechi' ládxi'li' nup nadzungac lidx guia, len lu yòl-la' rudziji queèli' bia' blenli' nup gulabíj lidxli' yugu' le guta' queèli'. Cni benli' le nózili' naqui queèli' le nacr dxi'a len le zoatecz ni' yehua' yubá. <sup>35</sup>Na'a, cutu uca'nli' lè na' runli' löz, le naché' tu le zxön ubi'è queèli' Dios. <sup>36</sup>Run bayúdx cözli' zxön ladxi', quiè cati' chbenli' ca rè'nnè' Dios, si'li' le gzxi' lu nè'è gunnè' queèli', ca na' nayúj lu guich la'y, ca gnè' Dios, rna:

<sup>37</sup>Yetú chi'idau'z

Gdxinè' Bönni' na' ral-la' guidè', Len cutu ca' tseyne'.

<sup>38</sup>Ni'r nu nac tsahui' lahua' neda', Ulá nu na' le rejle' neda'.

Chqui' hueycj tá'baga' neda', Cutur gdzag ladxa'a lè'.

<sup>39</sup>Na'a, rè'u ni, cutu nacrú' ca nup tu'huéycj ta'dá'baga' Dios len la'nít, san réjlè'ru' Cristo len nadél-li'ru' yòl-la' ruslá.

Ca nac yòl-la' rejle' queèru' Dios

**11** Na'a, le réjlè'ru' Dios, nac löz queèru' si'ru' le runru'

löz ati' nac bè' le curlé'iru'. <sup>2</sup>Cni gulayejlè'è Dios xuz xtau'ru', ati' qui lè ni na' nayúj lu guich la'y ca gac quequè', rna: "Gulurujè' dxi'a lahuè' Dios."

<sup>3</sup>Le réjlè'ru' Dios, ráquibe'iru' benè' yòdzlyú ni Lè' len didza' bè'zè'. Lèzca' cni, cati' benè' Dios yúgu'tè le rlé'iru', bugunè' dxin le cutu zuini.

<sup>4</sup>Le gyejlè'è Dios Abel, glu'è lahuè' Dios ròn queèba' bōa' bēdxdau', tu le nactèr lsaca' ca le glu'è lahuè' Dios Caín, len qui lè ni na' Dios benè' lna' lau queè' Abel na', gnè' naquè' tsahui', len benè' ba la'n lè na' glu'è lahuè'. Zal-la' chnatiè' Abel na', ga rdxintè na'a dza, nac tsca ru'è didza', le gyejlè'è Dios.

<sup>5</sup>Le gyejlè'è Dios Enoc, gdödè' ni' yehua' yubá len cutu ca' gutiè', ati' cutur nu budzōli lè', le buchétè lè' Dios, ati' nayúj lu guich la'y ca nac queè', rna: "Zi'al ca buchétè lè' Dios, benè' Enoc le rdzag ladxè'è Dios."

<sup>6</sup>Na'a, chqui' cutu réjlè'ru' Dios, cutu gac gunru' le rdzag ladxè'è Lè', ati' quiè gbíga'ru' gal-la' ga zoè' Dios, run bayúdx tséjlè'ru' zoaczè' Lè', len rubi'è qui nu rui' ladxi' Lè'.

<sup>7</sup>Cati' ni' Dios buzéjni'nè' Noé ca ral-la' lac le cutu ráquini Noé na', le gyejlè'è Dios Noé, benè' ca rna xtidzè'è Dios len bupé'è barco zxön na' nazí' lei Arca, ati' lè'i barco na' gululá bunách di'a dza queè' Noé. Le gyejlè'è Dios Noé, benè' ga nac bè' narugu quegac bunách yòdzlyú, len bdél-li'nè' guquè' tsahui' lahuè' Dios, le ta'del-li' nup ta'yejlè' Lè'.

<sup>8</sup>Cati' ni' Dios bulidzè' Abraham, le gyejlè'è Lè' Abraham, benè' ca rna xtidzè'è Dios len buzé'è ladzè'

quiè tsijè' latj ni' ral-la' si'è ca tu le gaqui tsaz queè', ati' brujè' ladzè' zal-la' cutu nõznè' gazx ni' ral-la' tsijè'. <sup>9</sup>Le gyejlè'è Dios Abraham, guquè' ca tu bõnni' zi'tu', gzoè' luyú na' Dios gzxi' lu nè'è gunnè' queè'. Gzoè' lu yu'u lári'dau', len la' tuz ca glunè' Isaac len Jacob, zxi'n xsoè' Abraham, nup ni' gzxi' lu nè'è Dios unõdzjè' quequè' lè na' gzxi' lu nè'è gunnè' queè' Abraham. <sup>10</sup>Cni benè' Abraham, le benè' lõz gdél-li'nè' yõdz na' zoa tsaz xlibi zõ'õ qui, le nuzóè' Dios xlibi zõ'õ qui, len glu'è ga na' zoè' Lèczè'.

<sup>11</sup>Lèzca' cni Sara, zal-la' chnacnu ngul huõdx, gyéjlè'nu Dios, ati' Lè' bè'è queènu yõl-la' huac buzoanu-bi' bi'idau'. Buzoanu-bi' bi'i bõnni'dau' zal-la' chgdöd iz queènu, le gyéjlè'nu Dios gunè' ca rna xtidzè'è na' gzxi' lu nè'è queènu. <sup>12</sup>Qui lè ni na', zal-la' chbgultsquè' Abraham, gulacua'bi' ziántèrbi' zxi'n xsoè', glacbi' tscá rø'ba' bõlj luzxbá, len tscá rø' yuzx ra' nis zxõn, nutu nu gac uláb leygac.

<sup>13</sup>Yúgu'tè bõnni' ni glatiè' len cutu gulazi'è lè na' gzxi' lu nè'è Dios unõdzjè' quequè', san gulayejlè'è Dios, len zi'tu' zi'tu'z gulalé'inè' lè na' ral-la' la'zi'è. Gulayejlè'è Dios, len glunè' Ina' lau qui lè ni. Cni gac, gululu'è nacquè' ca bõnni' zi'tu' len bõnni' ta'dazè' yõdzlyú ni. <sup>14</sup>Bõnni' tu'è cni didza', tu'lu'è ta'guiljè' tu latj gac ladzquè'. <sup>15</sup>La'naru' gulazá' ládxi'què' cni qui luyú ga ni' gularujè', le nactè ludzõlnè' nacx huõjquè' ni', <sup>16</sup>san gulazá' ládxi'què' qui luyú na' nacr dxi'a, le zoa yehua' yubá. Qui lè ni na' cutu rutui'nè' Dios cati' ta'né'

naquè' Dios quequè', le chnupé'è quequè' tu yõdz.

<sup>17</sup>Le gyejlè'è Dios Abraham, cati' gzxi' bè'è lè' Dios, budödè'-bi' lahuè' Dios bi'i Isaac queè' ca na' tu'dödè'-ba' lahuè' Dios böa' bèdx tu'dödcdè'-ba'. Gzoè' sina' Abraham udödè'-bi' lahuè' Dios bi'i bõnni' zi'al queè' na' zal-la' nacbi' bi'i na' gzxi' lu nè'è Dios gunnè' queè'. <sup>18</sup>Cni benè' zal-la' gudxè' lè' Dios, gnè': "Lu na'bi' bi'i Isaac quiu' gchísgaca'-bi' zxi'n xsu'." <sup>19</sup>Cni benè' Abraham, le gúquibel'inè' napè' Dios yõl-la' huac uspanè'-bi' lu yõl-la' gut, ati' ca tu le run lsaqui', huac gnaru' buzi'è-bi' lu yõl-la' gut zal-la' cutu gutbi'.

<sup>20</sup>Le gyejlè'è Dios Isaac, gnabnè' Dios gun la'yè'-bi' bi'i Jacob lenca' bi'i Esaú ca nacgac le luzi'bi' xbey dza zi'a za'. <sup>21</sup>Le gyejlè'è Dios Jacob, cati' ni' chzoa gatiè' gnabnè' Dios gun la'yè'-bi' tu tubi' zxi'nè' José, ati' gyij ladxè'è Dios, ni' nayecheuè' lu xuyág queè'. <sup>22</sup>Le gyejlè'è Dios José, cati' ni' chzoa gatiè', bè'è didza' qui dza na' la'rujè' luyú Egipto zxi'n xsoè' Israel, ati' gna bè'è ca ral-la' lu'è dxit queè' luyú ga na' tsajcu'è.

<sup>23</sup>Le gulayejlè'è Dios, cati' guljbi' bi'idau' Moisés, gulucachè'è-bi' xuz xna'bi' gdu ca tsonn beo', le gulalé'inè' nacbi' lach bi'i bõnni'dau' na', len cutu gládxinè' bõnni' rna bé'inè' bunách Egipto, bõnni' na' gna bè'è ludödcdè'-bi' bi'i bõnni'dau' na'. <sup>24</sup>Le gyéjlè'bi' Dios Moisés, cati' gzxõnbi', cutur bè'bi' latj nu uzóa lèbi' bi'i bõnni' queènu ngul zxi'nè' Faraón, bõnni' na' rna bé'inè' bunách Egipto. <sup>25</sup>Cni benbi' le

gúquibi' nacr dxi'a nu usaca' zi' lëbi' tsaxxón len bunách queë' Dios ca uzi'bi' xbey tu chi'z yugu' le tu'zi' xbey nup tun dul-la'. <sup>26</sup>Gúquibi' nacr lsaca' nu ulídiz ditj lëbi', ca na' guc queë' Cristo, ca gdél-li'bi' yugu' yöl-la' tsahui' quegac bunách Egipto, le gza' ládxi'bi' ca nac le ubi'ë queëbi' Dios. <sup>27</sup>Gdöd ni', le gyejlë'ë Dios Moisés, brujë' luyú Egipto, len cutu gúdxinë' yöl-la' rley queë' bönni' rná bé'inë' bunách Egipto, ati' bia' blenë' ca run nu rle'i Dios, Nu na' curlé'iru'.

<sup>28</sup>Le gyejlë'ë Dios Moisés, benë' Lni Pascua ca gna bé'inë' lë' Dios, len buchijë' rön gap nu ryaz lidxquë', cui gdödi zxi'nquë' nu na' ral-la' usnit yugu' bi'i bönni' zi'al quegac bunách Egipto. <sup>29</sup>Le gulayejlë'ë Dios, guladödë' bönni' Israel luyú bidx gatsj lahui'l nis zxön nazí' lei Nis Xna. Cati' glë'nnë' la'dödë' ca' ni' bönni' Egipto, gulayëpinë' nis.

<sup>30</sup>Le gulayejlë'ë Dios, cati' budx guladödë' bönni' Israel gdu zbi'il yödiz Jericó yugu' dza gdu gadx dza, gulaguíndj zö'ö tun chi'i yödiz na'. <sup>31</sup>Le gyéjlë'nu Dios Rahab, ngul rui'nu latj bunách, cutu gutnu tsaxxón len bunách Jericó na' cuglún ca rna xtidzë'ë Dios, le bennu ba la'n bönni' Israel na' duyúlanquë' le raclen bunách Jericó.

<sup>32</sup>¿Bixzar ral-la' gnia'? Ryadzj latj gu'a didza' ca glunë' Gedeón, len Barac, len Sansón, len Jefté, len David, len Samuel lenca' bönni' glu'ë didza' uláz queë' Dios. <sup>33</sup>Le gulayejlë'ë Dios, guluxicjë' zian yödiz zxön, len glunë' le nac

tsahui', ati' guladél-li'në' yugu' le gzxi' lu në'ë Dios unödzejë' quequë'. Guluseyjë' rú'acba' bëdx guixi'.

<sup>34</sup>Gululé' yugu' lu gui' zxön. Gularujë' lu na'gac nup ludödi lequë' len guia tuchi'. Dios bunë' lequë' tsutsu cati' ni' gulacuídi'në', ati' guluhuöaquë' ca' tsutsu lu gdil-l. Gululaguë' bönni' rjaquë' gdil-l guixz yu quequë' bönni' gza'a. <sup>35</sup>Yugu' ngul dza ni' guluzi'nu bi'i qui queëcnu nubancbi' lu yöl-la' gut.

Yela'quë' bönni' ni' glatië' lu na'quë' bönni' ni' gulusaca' zi'ë lequë', len le cutu glë'nnë' luca'në' Dios, cutu gulazi'ë latj nu usán lequë', quië la'dél-li'në' yöl-la' rubán lu yöl-la' gut, lë na' gláquinë' nactër dxi'a. <sup>36</sup>Yela'quë' bia' blenquë' yöl-la' rutítj len xzguia' qui gba'y, ati' guladzunë' lidx guia, nága'quë' du guia.

<sup>37</sup>Gululadxi' la'quë' guiöj bunách, len gulachözë'ë yela'quë'. Gulazí' bë' lequë', len guludöddë' la'quë' len guia tuchi'. Guladödë' na'l ni'l, nácuquë' guid zxacba' bö'cu' zxila' len chivo. Glaquë' yechi' len gulazaca' gulagui'ë, ati' guludxía lequë' dö' bunách. <sup>38</sup>Cni glaquë' bönni' na', ati' cutu glac lsaca' bunách yödizlyú ni luzi' xbeyquë'. Guladazë' lu latj ca'z len yugu' lu gui'a, ati' gulacua'zë' yugu' bloj len yugu' yeru luyú. <sup>39</sup>Yúgu'të' gularujë' dxi'a lahuë' Dios le gulayejlë'ë Lë', zal-la' cutu gulazi'ë luyú ni gzxi' lu në'ë Dios unödzejë' quequë'. <sup>40</sup>Cni guc, le nupë'ë queëru' Dios tu le nacr dxi'a quië cati' unë' lequë' gdu, rë'u ni gunru' tsaxxón lequë'.

**Ral-la' uyuru'-në' Cristo**

**12** Qui lë ni na', lëzca' rë'u, le nacuá' gdu zbi'il ga ni

zoaru' ziantër nup tun lna' lau  
ca ta'yejlë' Dios, ral-la' uca'nru'  
yúgu'të le cunác le nac ca tu le nac  
zi'i nua'ru', lenca' yúgu'të dul-la'  
ta'zón rè'u, ati' lu yöl-la' rböz zxön  
ladxi' queëru', ral-la' gunru' xchinë'  
Dios, le nac tsca xíti'ru' lu huitj le  
zoa lauru'. <sup>2</sup>Ral-la' uyuru'-në' Jesús,  
Nu na' run ga gac tséjlë'ru' Dios  
len Nu run ga rac gdu yöl-la' rejlë'  
queëru' Lë'. Jesús gzxaca' gdi'ë  
lë'i yag cruz, len bia' blenë' yöl-la'  
rutu'i qui, le gu'nnë' gdél-li'në'  
yöl-la' rudziji na' uzi'ë xbey, ati'  
yajchö'ë cuit lë'ë yubél Dios, ga ni'  
rö'ë rna bë'ë.

<sup>3</sup>Gul-yüë' Jesús, ca na' gzxaca'  
gdi'ë le gulusaca' zi'ë Lë' bönni'  
dul-la', cui gcuídi'li' len cui gac  
chop ládxi'li'. <sup>4</sup>Ga rdxintë na'a dza,  
cutu ca' bia' blenli' ga gdxintë nu  
gun lbi'ili' huë' le rdál'baga'li' le nac  
dul-la'. <sup>5</sup>Nazx ca' chgul ládxi'li' lë  
na' ruzéjni'në' lbi'ili' Dios, nacli' ca  
yugu' zxi'nczë', le nayúj lu guich,  
rnë':

Zxi'na', cutu uzú' tsla'l le gunë'  
Xanu',  
Usëdi uzéjni'në' li',  
Len cutu huöa ladxu'u cati' gut  
quinë' li'.

<sup>6</sup>Xanru' rut rguinë' nu nadxi'inë',  
Len rusëdi ruzéjni'në' yúgu'të  
nup nazí' lu në'ë lac zxi'nczë'.

<sup>7</sup>Ral-la' gua' glenli' le gut quinë'  
lbi'ili' Dios, le runë' Dios cni  
queëli' tsca nacli' zxi'nczë'. Cutu  
ca' zoabi' tubi' bi'idau' cutu gut  
quinë'-bi' xuzbi'. <sup>8</sup>Na'a, chqui' cutu  
rut rguinë' lbi'ili' Dios ca na' runë'  
quegac yúgu'të zxi'nczë', ni'r nacli'  
ca yugu' bi'i lagu', len cutu nacli'  
gdu zxi'në' Dios. <sup>9</sup>Yetú ca', cati' ni'

nacru' bi'idau', gulacu'ë xuz xna'ru'  
luyú ni, glut gulaguinë' rè'u, san  
runru' lequë' ba la'n. Ca' nac, ral-la'  
gunr-ru' ca rna xtidzë'ë Xuzru' zoë'  
yehua' yubá quië soaru' gbanru'.

<sup>10</sup>Yugu' xuz xna'ru', tu chi'z glut  
gulaguinë' rè'u tsca le gláquiznë'  
nac dxi'a, san cati' rut rguinë' rè'u  
Dios, nac quië gac tu le uzi'ru' xbey,  
gacru' gdu la'y ca nacczë' Lë'. <sup>11</sup>Le  
nactë cutu nalá' lahui na'a le uzi'ru'  
xbey qui le rut rguinë' rè'u, san run  
ga ruhu'i'niru'. Chqui' güi'ru' latj  
usëdi rè'u le rut rguinë' rè'u, gun  
ga cözru' dxí'adau' len ga gacru'  
tsahui'.

**Soa banádx queëru' chqui'  
cutu uzé nagru' chi'ë Dios**

<sup>12</sup>Qui lë ni na' gul-ún tsutsu na'li'  
rajxáqui'gac, lenca' zxibli' ta'zxi'z,  
quië gdip ládxi'li' gunli' le nac dxi'a.  
<sup>13</sup>Gul-zóa tu nöz tsahui', cui gunli'  
ga ucá'n nöz na' nu rcuidi' ladxi',  
san gul-gún ga huöac ladxi' nu na'.

<sup>14</sup>Gul-güi' ládxi'li' cózlenli' dxi'a  
yúgu'të bunách, len gacli' quizi queë'  
Dios, le chqui' cugunli' cni, cutu  
gac glé'ili'-në' Xanru'. <sup>15</sup>Gul-gún  
chi'i cuinli' cui soa nu ucá'n le ruzá'  
ladxë'ë queëru' Dios, len cui soa nu  
gac ca tu guixi' sla', cui utsá' lbi'ili',  
len cui gun ga cugacli' tsahui' zianli'  
lbi'ili'. <sup>16</sup>Gul-gún chi'i cuinli' cui gun  
le cunác o le cunác tsahui' nu dzag  
lbi'ili', ca na' benë' Esaú, bönni' ni',  
quië si'ë tu le gáguzë' bë'ti'ë le dë lu  
në'ë le naquë' bi'i bönni' zi'al queë'  
xuzë'. <sup>17</sup>Chnóziczli' ca na' guc queë'  
Esaú gdöd ni' cati' gu'nnë' gdél-li'në'  
le gnabnë' Dios xuzë' quië gac dxi'a  
queë'. Buzechë' queë' xuzë' ati' cutu  
guta' latj ubí'i ladxë'ë Esaú na' zal-la'



gdilj ladxë'è lei len yöl-la' rbödx queë'.

<sup>18</sup>Ca rac queëli' cutu nac ca guc quequë' bönni' Israel, gulabiguë'è gal-la' ga zoa tu gui'a le gac nu can, ati' gyegui gui'a ni', len böac chul lahui' dza le grö' böaj gasj, len gyeycj bö' bdunu'. <sup>19</sup>Gulayönnë' ta'bödx trompeta, lenca' chil'è Dios Nu bë' didza'. Cati' gulayönnë' lë ni, gláta'yue' lahuë' Moisés cutur güi'lenë' lequë' didza' Dios. <sup>20</sup>Cni glunë' le cutu guc gua' glenquë' lë na' gna bé'inë' lequë' Dios, gnë': "Chqui' tsajlibba' gui'a ni tuba' böa' guixi'dau'z, ral-la' luladxë'-ba' guioj, o ludödë'-ba' yag tuchi'."

<sup>21</sup>Szxónitër ben gadxi lequë' lë na' gualé'inë', ati' Moisés gnë': "Radxi rdzöbda' len rrxiztsca'."

<sup>22</sup>Na'a, lbi'ili' ral-la' gádxitërli' le rbíga'li' gal-la' tu lu gui'a nazi' lei Sión, len ga zoa yödz queë' Dios ban, le nazi' lei Jerusalén qui yehua' yubá, ga na' nacu'è gbaz la'y guixz yu queë' Dios. <sup>23</sup>Rbíga'li' gal-la' ga ni' nudubgac lahuë' Dios zxi'nczë', nup na' nayujgac lagac lu guich ni' yehua' yubá, lenca' ga zoë' Dios Nu rbequi xbey yúgu'të bunách, len ga na' nacuá' bö' glacczë' bönni' tsahui', Dios bunë' lequë' dxi'a.

<sup>24</sup>Rbíga'li' ca' ga zoë' Jesús, Nu ben tsutsu didza' cub na' rucá'n tsahui', lenca' ga nagu'è rön queë' Jesús le run ga runít lahuë' rë'u Dios, rön na' run le nacr dxi'a ca le ben xchönë' Abel, le ben ga nu gchuguë' qui Dios.

<sup>25</sup>Qui lë ni na', gul-gún chi'i cuinli' cui tá'baga'li' Nu na' rui' didza'. Cutu ca' gululá nup ni' guladá'baga' nu na' bulídz lequë' luyú ni. Nazxgar rë'u, cutu ca' ularu' chqui' tá'baga'ru'

Nu na' rulídz rë'u, zoë' yehua' yubá.

<sup>26</sup>Dza ni' gzxiz luyú ni le byön chi'è Dios, san na'a chgzxi' lu në'è, gnë':

"Yetú lzuz, len clëgz luyú uxizia', san luzxbá ca' uxizia'." <sup>27</sup>Cati' ni' rnë':

"Yetú lzuz", lë ni rulu'í rë'u ral-la' gdua le gac la'zxíz, lë na' rë' yödzlyú ni, ati' lugá'n le cugác la'zxíz, lë na' rë' yehua' yubá. <sup>28</sup>Qui lë ni na', le ral-la' gdél-li'ru' tu latj ga gna bë'ru', le cugzxíz, guiëru'-në' Dios: "Xclenu'", ati' lu yöl-la' ba'a ladxi' len lu yöl-la' radxi Lë' tsej ládxi'ru' Lë' ca na' rdzag ladxë'è Lë', <sup>29</sup>le naquë' Dios queëru' ca tu gui' rusnít le cunác gdu dxi'a.

**Le ral-la' gunru' le rdzag ladxë'è Dios**

**13** Ral-la' gdxí'iteczli' lza'li' tuli' yetuli'. <sup>2</sup>Gul-tsajnéy ral-la' uzoali' lidkli' nu gdxin ga zoali'. Cati' glun cni la'gac bunách, gulucu'è lidxquë' gbaz la'y queë' Dios, zal-la' cutu gláquibe'inë' nacquë' gbaz la'y.

<sup>3</sup>Gul-tsajnéy nup nadzungac lidx guia tsca nunli' tsaxón lequë', nadzunli' ca' lidx guia. Gul-güi' ládxi'li' bönni' ta'bía ládxi'gac lequë' bunách, tsca lbi'ili' rzaca' rguí'lenli' tsaxón lequë'.

<sup>4</sup>Ral-la' gunli' ba la'n yöl-la' nutság na', ati' lu yöl-la' ba'a ladxi' queë' ral-la' sóalenë'-nu ngul queë' bönni', le gchuguë' Dios quegac nup tun le cunác len nup ta'guítsj zxba qui yöl-la' nutság na'.

<sup>5</sup>Cutu bi uhuídi'li', san gul-dzág ládxi'li' tsca le dë queëli' na'a, le chgnë' Dios: "Gatga uca'na' li', len cutu ubj ladx'a li'." <sup>6</sup>Cni nac, huac gnaru' gdu ládxi'ru' lë na' rna:

Xanru' naquë' Nu raclen neda'.

Cutur gádxida' bi gun quia' bunách.

<sup>7</sup>Gul-tsajnéy yugu' bönni' tu'yúë' lbi'ili', nup na' tu'sédi lbi'ili' xtidzë'ë Dios. Gul-yú ca nadél-li'que', len gul-gún ca tunë' lu yöl-la' rejle' quequë' Dios.

<sup>8</sup>Tuz ca naquë' Jesucristo, nij, len na'a, len tsalzú. <sup>9</sup>Cutu güi'li' latj gchë'gac lbi'ili' ga yubl yugu' zxba gza'a len zxba nadzá'. Nac dxi'a gunli' tsutsu icj ládxi'dau'li' ca nac le ruzá' ladxë'ë queëli' Dios, len clëg ca nacgac zxba qui le ri'j ráguru', lë na' cutu luzí' xbey nup tui' ládxi'gac leygac.

<sup>10</sup>Zoa queëru' tu bcugu la'y, le cutu luzí' xbey nup tun dxin qui didza' rucá'n tsahui' bla' zi'al.

<sup>11</sup>Bxuz blau qui yu'u la'y na' glu'ë xchöncba' böa' bëdx lu latj nactër la'y ni'a qui dul-la', san guluzégui'ë bëla' ca'z quecba' ga nac ni'l ra' yöd. <sup>12</sup>Lëzca' cni gzxaca' gdi'ë Jesús ni'l ra' yöd quië bunë' bunách dxi'a len rön queëczë'. <sup>13</sup>Tsajta'aru'-në' Jesús, zal-la' la'bíj rë'u lu yöd bunách, len si'ru' tsaxón len Lë' lë na' gululídz ditj Lë' bunách. <sup>14</sup>Cutu zoa queëru' yödzyú ni tu yöd zoa tsaz, san rguiljru' lë na' zi'a za'. <sup>15</sup>Qui lë ni na', ral-la' cú'teczru'-në' Dios yöl-la' ba, ugunru' dxin lë' Jesucristo. Yöl-la' ba na' nac ca tu le rgu'ru' lahuë' Dios. Ru'a cuinru' guiëru'-në' Dios xclenu' ni'a qui le naquë'. <sup>16</sup>Cutu gal ládxi'li' gunli' le nac dxi'a len gácleni' lza'li' tuli' yetuli', le nac lë ni ca tu le rgu'ru' lahuë' Dios le rdzag ladxë'ë Lë'.

<sup>17</sup>Gul-gún ca rna xtídza'que' bóchi'ru' tu'yúë' lbi'ili', len gul-güí' latj la'ná bé'inë' lbi'ili', le tun chi'ë icj ládxi'dau'li', ca tunquë' bönni' ral-la' la'guíxjö'ë lahuë' Dios le

nunquë'. Gul-gún cni quië lunë' dxin na' lu yöl-la' rudziji quequë' len clëg lu yöl-la' rsëbi ladxí' quequë', le cutu ca' uzi'li' xbey dxin na' lunë' lu yöl-la' rsëbi ladxí' quequë'.

<sup>18</sup>Gul-lidzë' Dios, gnábili'-në' gáclenë' netu', le runtu' löz soa dxi icj ládxi'dau'tu', cutu uxós netu', len rui' ládxi'tu' gúntecztu' le nac dxi'a. <sup>19</sup>Le nacr blau, ráta'yua' lauli' gnábili'-në' Dios ugu'ë neda' tu nöz udxina' queëli' bayónr.

**Dios uzá' ladxë'ë queëru'  
le gaclen rë'u**

<sup>20</sup>Na'a, rnábitu'-në' Dios, Nu run ga rac dxi'a queëru' len Nu buspán Xanru' Jesucristo lu yöl-la' gut, Nu na' nac Bönni' Blau Uyú Bö'cu' Zxila', le bulaljë' rön queë' le run tsutsu didza' rucá'n tsahui', le zoa tsaz, <sup>21</sup>rnábitu'-në' gunë' ga gacli' gdu, quië gac gunli' yúgu'të dxin dxi'a, len gunli' ca rë'nnë' Lë', ati' gunë' queëli' le rdzag ladxë'ë Lë', le náquili' queë' Jesucristo. Queë' Cristo gactecz yöl-la' ba. Ca' gac.

<sup>22</sup>Ráta'yua' lauli', böchi' lza'adau', güi' ládxi'li' didza' ni ruzejni' lbi'ili', le nac láti'dau'z lë ni ruzuja' queëli' lu guich. <sup>23</sup>Ral-la' gnózili' chburujbi' lidx guía bi'i Timoteo, bi'i bóchi'ru'dau', ati' chqui' gdxintëbi' quia' ni, gunbi' neda' tsaxón duyutu' lbi'ili'.

<sup>24</sup>Gul-gáp Dios bóchi'ru' tu'yúë' lbi'ili', lenca' yúgu'të bunách nubijë' quizi queë' Dios. Tu'gáp lbi'ili' Dios bunách ta'yejlë' Cristo nacua' luyú Italia.

<sup>25</sup>Dios uzá' ladxë'ë queëli' yúgu'tëli'. Ca' gac.